

INUIT ATAQATIGIIT

INATSISARTUNI



12. august 2016

UKA 2016/106

Inatsisartut suleriaasianni § 33 naapertorlugu aalajangiiffigisassatut siunnersuut manna saqqummiuppara:

Naalakkersuisut UKA17-mut Nunatta nunatut issittumiittutut inissismanera nunarsuarmioqatigiinnilu inissismanerput pillugu politikkikkut periarfissarisai aallaavigalugit, Issittoq pillugu periusissiamik suliaqarnissaannik Inatsisartut aalajangiiffissaattut siunnersuut.

(Inatsisartunut ilaasortaq Sara Olsvig, Inuit Ataqatigiit)

Tunngavilersuut:

Issittoq issittumi innuttaasunit ilusilersorneqarpoq. Issittumi ineriertorneq issittumi inuiaqatigiit inuiaallu siuttoralugit ingerlanneqassaaq. Inuaat kalaallit issittumi inuiaavugut Issittullu ineriertornerani pingaaruteqartumik innissismaffeqarluta.

Maanimi aalajangikkavut amerlasuutigut Issittup sinneranut sunniuteqartarpot. Aalisarneq pineqarpat, aatsitassarsiorfinnik pilersitsinissaq pineqarpat imartakkulluunniit angallanneq pineqarpat, attaveqaqatigiinnikkut nalunaarasuartaateqarnikkullu inerisaaneq pineqarpat, nunarsuarmioqatigiinnut ataqtigiffeqarpugut minnerunngitsumillu issittormioqatitsinnut ataqtigiffeqarpugut. Inatsisartuni kommunenilu aalajangikkavut amerlasuut Issittumi ineriertornermic ilusilersueqataapput.

Taamaammat Issittumi inissismaffippot qanoq atorniarnerlutigu erseqqissumik periusissiaqarnissarput pisariaqarpoq. Nunatta inissismanera qanoq isigaarput, Nunattalu Naalagaaffeqatigiinnilu nunat allat marluusut akornanni sunniivigeqatigiinnerput Issittoq pineqartillugu qanoq ippa? Tamanna erseqqissumik akissuteqarfingisinnaasariaqarparput.

Naalagaaffeqatigiinni ataatsimoorussamik Issittumut Periusissiaqarpoq. Periusissiaq 2011-mi naammassivoq 2020-llu tungaanut atuuttussaalluni Nunattalu, Savalimmiut Danmarkillu akornanni suleqatigiinnikkut suliaavoq. Naalagaaffeqatigiinni nalunangitsumik Issittoq pillugu soqutigisanik ataatsimoorussaqpugut, pissusissamisorporli Nunarput nunarsuup ilaanut najukkatsinnut nammineq tunngavigisatsinnik isiginnittariaaseqarutta, Nunarpullu nammineq Issittumi inissismanerput pillugu isiginnittariaatsini oqasertalerlugulu ineriertortikkuniuk. Savalimmiunut tamanna aamma atuuppoq savalimmiormiullu namminneq periusissaminnik quleqatalimmik "Savalimmiut – nuna Issittumiittooq" 2013-mi saqqummiussipput.

Isumaqtigisutaasimavoq Naalagaaffeqatigiiffiup Issittoq pillugu periusissiaa piffissap atuuffissaata qiteqqunnerani nalilersorneqassasoq.

Nalilersuisoqareerpat naatsorsuutigineqassaaq periusissiamik 2020-mit atuuttussamik nutaamik suliaqartoqassasoq.

Naalagaaffeqatigiiffiup Issittoq pillugu periusissiaani maanna atuuttumi pingaarnertut makkua anguniagaapput:

- Issittoq sorsuffiunngitsoq isumannaatsuuusorlu
- Siuariartorneq imminut napatittooq inuiaqatigiittullu piujuannartitsineq
- Issittumi silap pissusianut, avatangiisirut pinngortitamullu ataqqinninneq
- Nunat tamalaat akornanni suleqatigisartakkat qanimut suleqatiginissaat

Inuit Ataqatigiit isumaqarpugut Nunatta Issittumut periusissiassaa anguniakkat pingaernerit taakkartorneqartut tunngavigalugit suliarineqassasoq. Isumaqarpugulli Naalagaaffeqatigiiffiup periusissiassaminik nutaamik suliaqannginnerani Nunatta anguniagassaminik sukumiisumik eqqartuereerlunilu allattuereertariaqartoq. Isumaqarpuguttaaq suliassaqarfinni tamani Issittumut tunngassuteqarsinnaasuni nipitsinnik anguniakkatsinnillu erseqqissaassasugut.

Nunanut allanut politikkikkut suliassaqarfinni angerlaassimasatsinni Nunatsinniillu tamakkiisumik akisussaaffigineqartuni oqartussaaffik tigummivarput. Inuit Ataqatigiinniilli isumaqarpugut sillimaninermut illersornermullu politikkikkut aamma inissismaffitsinnik periusissatsinnillu eqqartuisariaqartugut – suliassaqarfiiit taakkua oqartussaaffigilersimangikkaluarlutigit isumaqarfigaavut - eqqartuillatalu oqaasertalersinnaassavavut.

Issittoq nunanut allanut, sillimaniarnermut illersornermullu politikkimut taamaallaat tunngangnilaq. Issittoq aamma inuiaqatigiinni issittumiittuni isumaginninnikkut, aningaasaqarnikkut, ilinniartitaanikkut kultuurikkullu ineriartortitsinermut tunngavoq, nunallu inuiaallu issittumiittut akornanni attaveqarnikkut nukittorsaanissamut tunngalluni. Tamatumani Inuit Ataqatigiit isumaqarpugut Nunatta Issittumi inissismaffini nukittorsartuassagaa, Nunarput pillugu inuiaallu issittormiut allat pillugit. Issittumi inuiaqatigiit, nunat namminersortut inuiaallu issittumiittut aallaavigalugit ineriartortitsinissamut aqqutissiuussisutut siuttuussaagut.

Inuit Ataqatigiit suliassaq qilanaaraarput isumaqarpugullu namminersorneq pillugu isumaqatigiissummut naapertuuttuusoq.

Aningaasaqarnikkut allaffissornikkullu kinguneqaatit

Periusissiornissap AC-tut akissarsiallip ukioq ataatsip sulineranut aningaasartuutinik 500.000kr-usunik kinguneqarnissaa naatsorsuutigineqarpoq.

Namminersorlutik inuussutissarsiortunut kinguneqaatit

Issittumut periusissiaqarnikkut Nunatta Issittumi nunatut inissismaffini pillugu erseqqinnerusumik oqariartorsinnaanissaanut aqqutissiuussisoqassaaq taamalu ilinikkut namminersortunut pisortallu inuussutissarsiornikkut Issittumi suleqatigiinnissamik periarfissarisat erseqqississallutik.

Innuttaasunut kinguneqaatit

Soqanngilaq.